

# Re-flowable eBooks

● ● ●

☰ ☷

BUY 論語

AA 🔍 📌

為政第二

1. 子曰：「為政以德，譬如北辰，居其所而眾星共之。」

2. 子曰：「詩三百，一言以蔽之，曰：思無邪。」

3. 子曰：「道之以政，齊之以刑，民免而無恥；道之以德，齊之以禮，有恥且格。」

4. 子曰：「吾十有五而志於學，三十而立，四十而不惑，五十而知天命，六十而耳順，七十而從心所欲，不踰矩。」

5. 孟懿子問孝。子曰：「無違。」樊遲御，子告之曰：「孟孫問孝於我，我對曰，『無違。』」樊遲曰：「何謂也？」子曰：「生，事之以禮；死，葬之以禮，祭之以禮。」

6. 孟武伯問孝。子曰：「父母唯其疾之憂。」

7. 子游問孝。子曰：「今之孝者，是謂能養。至於犬馬，皆能有養；不敬，何以別乎。」

8. 子夏問孝。子曰：「色難。有事，弟子服其勞；有酒食，先生饌，曾是以為孝乎？」

9. 子曰：「吾與回言終日，不違如愚。退而省其私，亦足以發，回也不愚。」

10. 子曰：「視其所以，觀其所由，察其所安。人焉廋哉？人焉廋哉？」

11. 子曰：「溫故而知新，可以為師矣。」

12. 子曰：「君子不器。」

13. 子貢問君子。子曰：「先行其言，而後從之。」

14. 子曰：「君子周而不比，小人比而不周。」

15. 子曰：「學而不思則罔，思而不學則殆。」

16. 子曰：「攻乎異端，斯害也已。」

17. 子曰：「由！誨女知之乎！知之為知之，不知為不知，是知也。」

18. 子張學干祿。子曰：「多聞闕疑，慎言其餘，則寡尤。多見闕殆，慎行其餘，則寡悔。言寡尤，行寡悔，祿在其中矣。」

19. 哀公問曰：「何為則民服？」孔子對曰：「舉直錯諸枉，則民服；舉枉錯諸直，則民不服。」

20. 季康子問：「使民敬忠以勸，如之何？」子曰：「臨之以莊則敬，孝慈則忠，舉善而教不能則勸。」

21. 或謂孔子曰：「子奚不為政？」子曰：「書云：『孝乎惟孝，友於兄弟，施於有政。』是亦為政，奚其為為政？」

22. 子曰：「人而無信，不知其可也。大車無輅，小車無軌，其何以行之哉？」

23. 子張問：「十世可知也？」子曰：「殷因於夏禮，所損益可知也；周因於殷禮，所損益可知也。其或繼周者，雖百世，可知也。」

24. 子曰：「非其鬼而祭之，諂也。見義不為，無勇也。」

No pages left in this chapter

Page 7


Page 6

Back to page 5

Right to left and lines read down



# Re-flowable eBooks



Left to right and lines read across